

中論 — 觀因緣品

	<b>四因無生</b> 諸法不自生	亦不從他生
	不共不無因	是故知無生
	<b>緣性無故</b> 如諸法自性	不在於緣中
	以無自性故	他性亦復無
	<b>說四緣生</b> 因緣次第緣	緣緣增上緣
	四緣生諸法	更無第五緣
	果為從緣生	為從非緣生
<b>因緣</b>	是緣為有果	是緣為無果
	因是法生果	是法名為緣
	若是果未生	何不名非緣
	果先於緣中	有無俱不可
	先無為誰緣	先有何用緣
	若果非有生	亦復非無生
	亦非有無生	何得言有緣
<b>次第緣</b>	果若未生時	則不應有滅
	滅法何能緣	故無 <b>次第緣</b>
<b>緣緣</b>	如諸佛所說	真實微妙法
	於此無緣法	云何有 <b>緣緣</b>
<b>增上緣</b>	諸法無自性	故無有有相
	說有是事故	是事有不然
<b>實無有生</b>		
<b>結</b> —	<b>緣中有果 不得生法</b>	
	略廣因緣中	求果不可得
	因緣中若無	云何從緣出
<b>例</b> —	<b>緣中無果 亦不得生</b>	
	若謂緣無果	而從緣中出
	是果何不從	非緣中而出
<b>顯</b> —	<b>緣無自性</b>	
	若果從緣生	是緣無自性
	從無自性生	何得從緣生
<b>由果無故 無緣非緣</b>		
	果不從緣生	不從非緣生
	以 <b>果無有故</b>	<b>緣非緣亦無</b>
	若眾緣和合	而有果生者
	和合中已有	何須和合生
	若眾緣和合	是中無果者
	云何從眾緣	和合有果生